

Frenk Kock y Papito Rafael dos baluarte musical SAC ta orguyoso di por dedica Festival di Tumba di Carnaval 60 na Papito Rafael

Despues cu SAC a anuncia cu e gran Festival di Tumba di e aña aki, lo ta conta cu un participacion mas grandi cu nunca y lo brinda honor na 2 baluarte, ta na su luga pa duna atencion na ambos baluarte, contando asina nan historia y carera musical. E parti aki ta dedica na Papito Rafael, cu sigur ta considera como un baluarte cu tur honor pa su gran impacto musical den historia di Aruba.

Ridnald Rafael, miho conoci como "Papito", for di hoben tabata tin e ritmo den su sanger. For di tempo di scol basico,

Papito ya caba tabata toca cu potlood riba banki den klas y e docentenan constantemente mester a hala su atencion.

Su carera musical a cuminsa, na momento cu el a cuminsa toca cu un grupo di Gaita; "Los Paranderos", unda cu despues Papito hunto cu e integrantenan, cu tambe tabata su amigonan di bario, a dicidi pa lanta un banda cu e nomber di "The Otty's".

"The Otty's" a kibra y a lanta "Version Original", cu tabata un banda mas formal, cu hasta un brass section, unda cu Papito

tabata toca drumset, timbal y tambe canta.

Asina Papito a amplia su experiencia musical, formando parti di diferente banda, entre otro: "Los Condes", "Musical Time", "Sound & Harmony" y "Triple S". Pa mas di 12 aña el a dirigi e banda "Papito y su Doble Sabor", cu tambe a logra sali varios biaha "Banda di Aña".

Festival di Tumba a cera conoci cu e talentoso Papito, cu a sa di konkista e titulo di "Rey di Tumba" no menos cu 5 biaha, di cual el a logra e titulo di Rey



di Tumba pa 3 aña consecutivo; 1993, 1994, 1995.

Despues Papito a logra gana e titulo maximo bek na aña 1998 y e ultimo biaha cu el a carga e titulo di Rey di Tumba, tabata na 2000.

Papito a expande y tambe a participa na e famoso Calypso & Roadmarch Contest, unda cu na 3 ocasion el a logra cay den finalista, cu e cancion "Egyption Dance" y na aña 2003 Papito a sali 2ndo finalista cu e Roadmarch "Changé".

Papito su hitnan di mas grandi cu a causa furor tabata e temanan "Chobolobo" y "Manolo", cu ta e temanan cu a hiba e banda na un gira di un luna largo na Europa. Aki Papito y su Doble Sabor a toca mano a mano cu e banda Doble R di Corsou y Trafasi, Enos y Pegasaya di Hulanda. Papito sigur ta un baluarte grandi riba tereno musical, specialmente den e temporada di Carnaval y no tin duda cu e Festival di Tumba aki merece di ta na su honor, haciendo asina e celebracion di Carnaval 60 uno mas grandi y cu mas contenido.